

中西紀事

中西紀事卷之二十一

江上雜著

江楚黜教

西人之入中國也。藉傳教游歷各省。則出自法郎西者。蓋十之九。自壬寅議撫通商。越三年。而法人在粵。請弛華民傳教之禁。部議允行。具詳第二卷中。已未天津議撫。載入法約第十三款內。然與在粵所請大畧相同。迨十年換約續增第六款內。開華人無論軍民。有傳習天主教。會集講道。建堂禮拜者。地方官不得妄行查拏。違者予以應得處分。又將前謀害天主教時。所充之天主堂學堂墳塋地方。

等件。應賠還法國駐京公使。轉給該處奉教之人。於任法國傳教之士。在各省租買地土。建造自便等語。查舊檔康熙雍正間。因西洋傳教之風日熾。大吏請申康熙八年直省開堂之禁。奏請各省及粵東外府縣之天主教堂。悉撤爲公廨。歷經查辦在案。法人所索賠還之地基。蓋卽指此。而中國傳教之奸民。互相煽引。滋擾無休。江西撫州門外。有法夷在義冢之旁。租賃民屋一區。常以黑夜傳教。亦不敢自立教堂名目。其他如撫建袁瑞臨吉等處。亦多似此。惟吳城東菜園地方。設有教堂。多歷年所。道光間新建知縣某。援禁撤毀。嗣又于望湖樓下。改設一區。咸豐五年水

師統領。今兵部侍郎彭玉麟復率兵勇毀之。以其地爲龍王廟。時天津新議未行。法人及傳教之士不敢阻也。京師換約之踰年。法人請赴各省傳教。由總理衙門給與執照。有法士羅安當者。來至江右。舟泊九江。遣其副方安之赴省。向南昌府衙門呈遞照會。約期晉省。時江西巡撫毓科會商善後。總局派委予及前署德化知縣張國經充接伴使。前赴撫州門外晤方安之。方固廣東南海縣人也。据稱羅教士現已自滬起程。帶有總理衙門咨文。面見大府。商請一切事件。竝据方安之稱省城內快子巷有法國新置一區。以爲育嬰公會。內養女嬰十餘人。請入視之。約以暮

歸。稟之大府。諾焉。時十一年十一月也。踰月十八日。羅安當至省。由方安之先期照會。請代通報。爰暨張令會同南昌。新建知縣約相見于公所。羅行免冠禮。遂同入城。自撫軍以下。皆按平行禮接待。坐間。面呈恭邸咨文一角。則賠還吳城教堂事也。時己歲暮。法士請在城內育嬰公會過年。撫軍許之。初。羅安當將至江。撫傳詢相見儀注。予因檢天津新議法約第四款。內稱兩國官員辦公人等。因公往來。各隨名位高下。准用平行之禮。法國大憲與中國京內京外大憲公文往來。俱用照會。法國二等官員與中國省中大憲公文往來。用申陳。中國大憲用劄行。其兩國平等

官員照相竝之禮等語。詳其文義所稱。彼國大憲。指全權公使而言。中國京外大憲。指京師之王大臣及外省督撫而言。若所稱二等官員。則彼國之總領事及正副領事以下也。又檢英約內開。該國正領事與中國道台同品。副領事繙譯官與知府同品。凡衙署相見會晤文移均用平禮。又英人在滬。照復桂相。援法國二等官員類推。領事官既與道台同品。總領事應與藩臬同品。今統核二國之約。必彼國有全權官銜者。始得與京內之王大臣京外之督撫平行明矣。查羅安當不過彼國一傳教之士。本無官職可比例。而据其前次來東。稱法國總理江西傳教事務。則與

現在九江領事。自稱總理江西通商事務者同。九江領事  
既與九江監督同品。來往文移。悉用平行儀注。則其行文  
撫憲。須用申陳。與道員行文。撫憲之稱。詳稱稟者同。而其  
來往謁見。亦當如司道見督撫之儀。轅門外下輿。由角門  
進。督撫迎送。如見司道儀。今羅安當比照九江領事官例。  
已屬優待。謹摘錄條約。繕具清摺。呈送核行。等因。撫軍是  
之。及羅至省。二次。東內忽增入代理全權大臣字樣。予方  
請中丞駁回。而中丞已傳諭升炮開中門。如督撫相見之  
儀。江省紳民聞而駭之。羅既出。有識之者曰。此二十餘年  
前潛匿廂巷中。

廂巷卽其舊天主堂地名

被前撫吳文節公驅逐出境

者也。又有識方安之者。以爲卽江西之撫州人。適羅安當  
攜其傳教告示。請飭地方官張貼。衆議洶洶。踰年而難端  
作。

當法人之請領執照也。分遣傳教之士。游行各省。將至楚。  
楚南長沙湘潭一帶。傳教之奸民。相與夸耀其事。以爲吐  
氣揚眉。復見天日。楚之紳士。聞而惡之。乃撰爲公檄。議懇  
天主教有昇屋居住者。火之。有容留詭寄者。執之。有習其  
教者。宗族不齒。子弟永遠不准應試。大畧謂其藉宣講爲  
名。裸淫婦女。設女嬰之會。采取紅丸。其他種種奸惡。描寫  
盡致。流傳入江。正羅安當持照赴省。逗留不去。時值試期。



將及江省巨紳大集于豫章書院。則有告歸之翰林院檢討夏廷桀。在籍之甘肅臬司劉于溥等。將楚南公檄鳩貲付梓。一日夜刷印數萬張。徧揭省城內外。通衢法人聞之。請詰主者。會同治改元。江撫內召。受代者爲沈幼丹中丞。葆楨未至。則督糧李黼堂觀察。桓文恭子也。時方升任藩司。護撫篆。乃以五日京兆辭。迫中丞至。赴愬不面。往拜謁。于是教士益失望。而時值南昌郡試之期。學使之按臨者亦及焉。二月十七日。予在郡署校閱。日晡。王霞軒太守必達。南昌孫雪筠大令。家鐸。急走語予曰。頃見外間揭帖。期以明日午刻。拆毀天主教堂。倘激而生變。非但地方官

未便。卽委員亦未便也。予曰爲之奈何。二人曰檢討主講豫章雖不預謀。可以止之。予曰檢討日飲無何。杜門謝客。惟兒子識其小阮數人。請往覘之。歸寓呼兒子策騎疾去。甫出門而羅方之謀者至。告曰嬰堂已被劫。主人幸無恙。今疾趨出撫州門矣。然女嬰已失勢。將及城外教堂。不識能保全否也。予乃偕張令亟趨郡署。則兩首縣皆在焉。遂同詣快子巷。除育嬰會被毀外。又拆徙教之店屋民房數十間。漏初下。城門已扃。歸告中丞。中丞嘆曰。夷人逞志于我久矣。不虞吾民之藉手以報也。雖然辦理不善之咎。我輩自任之。幸勿作緝捕論也。爰据實入告。自請嚴議。而地

方官及委員之接伴者。皆不及于効。

十八日再毀法國城外之舊天主堂。又毀教士坐船一隻。皆夜毀之也。羅安當之逸而出也。與方安之分道而走。方至瑞州。羅至撫州。中途憩息于從教陳姓之宅。是日予探得城內及城外散失之女嬰共二十餘人。皆在南昌之荏港與進賢接界。蓋教士之謀者告之也。予以語雪筠曰。女嬰之在荏港。有乳婦領之。將送至撫州。該夷育嬰會中。然省中事起。沿途皆以逐天主教爲名。若女嬰被劫。彼固何罪。尤恐教士之有以藉口也。雪筠乃選派妥役。自在港截回。逐名點驗。連乳婦共二十七人。以舟送入撫州。果也南

昌進賢兩界之居民。以搜捕羅安當不得。連劫陳姓數家。羅逃入潯。由潯至滬。遂達總理衙門。旋准恭邸函致中丞。意欲仍照賠還完案。中丞議以五千兩償其教堂。嬰堂及酌貼從教被毀之房屋。派委予至潯面議。而羅安當聞委員將至。避入上海。由上海總領事控訴該國駐京公使來文內稱。連年各處被虧。及現在省城進賢兩處房屋器用。經典等項。共計估值七萬兩。又欲索撫州門外之丁家山。及九江西門外之琵琶亭空地。以備該國教士隨時建造房屋教堂墳塋之用。交羅安當承管。由總理衙門咨照在案。踰年羅安當方安之復。乘舟赴省。理論。方伯滕王閣下。

見河干豎一大旗。禁止法夷入城。隨有拋擊磚石。飛中其舟。始解纜下駛。中丞派員前往。諭以迅速赴潯。由九江關督會商辦理。該夷始稍稍斂戢。卒以二萬金議結完案。又索九江城外琵琶亭空地若干畝。卽美界外之餘址也。法人在潯。旣無貿易。亦無領事。而以傳教與波。占立馬頭。餘地故英美二國商人亦陰慕之。謂其爲不商不賈之游民。皆約中游歷二字啟之也。

方教堂事之發也。江省紳士。以衅由揭貼公檄。轉相號召。遂爲拆毀者口實。相與冤愬。嗣聞江撫辦理此案。不株連紳士。不牽涉地方官。乃由檢討夏廷渠呈送骨殖一包。銅

管一具。血膏一合。向江撫面稱骨殖起自該夷教堂院中。銅管係取購所用。血膏係嬰兒精髓合成。中丞以其言多不經。亦無根據。發交南昌府縣查辦。經南新二縣按蒸檢法檢驗。該骨數具。並無傷痕。其銅管血膏似係外洋之物。亦不識其所用。因詳稱奉發各件。在該紳等雖非崔有所見。而地方官實已先有所聞。除骨殖業已驗明。應毋庸議外。其銅管血膏。究係外洋所用。無從辨認。一經傳播。便駭聽聞。亦似非無因而起。應將原件繳呈。請卽咨照總理衙門。轉向駐京法使查詰。咨會來江。以釋紳民疑團。以散中外和好等情。由江撫咨行在案。繼以此案仍照賠款議結。

其事遂寢。

楚中黜教之公檄既行。法人之傳教者。與江西先後並至。遂有湖南之長沙湘潭等縣起而攻之。江西拆毀教堂在元年二月間。而楚中湘潭之役。亦以是時踰月。有江西南豐編修吳嘉善者。自楚中踴歸。過省中館。于夏檢討之宅。時檢討竹林方以江事爲憂。聞編修自楚歸。詢以楚事。自言其僑寓在楚。適教堂獄起。波及從教數十家。該編修因習西洋繪事。傳其照鏡點水之術。嬉戲以爲常。一日突遇數百人。仡然而入。謂其爲天主教徒。將執之。某欲辨不及。毀垣而逃。則寓中之刼。擄一空矣。檢討之姪某大令走

告予。予曰。今士大夫之從天主教者豈少哉。蓋某編修之託詞也。大令曰。請試之。乃倩編修傳其繪法。一日間傳寫數像。鬚眉畢肖。始信其言之不誣。傳聞楚中事發。地方官被劾革職。勒限嚴緝。然邸抄不具。惟是年三月初十日奉上諭。總理各國事務衙門奏請飭地方官于交涉教民事件。迅速持平辦理一摺。前據該衙門奏稱。天主教原以勸人行善爲本。是以降旨令地方官妥爲辦理。茲據該衙門奏稱。各省地方官于奉文後。未盡認真妥辦等語。著該督撫轉飭地方官。照依此次所奏。于交涉教民事件。務須迅速持平辦理。不得意存偏重。以示一視同仁之意。摺內所



請各節均著依議行。欽此。按此奏正在江楚毀教之後。疑卽該教士控愬入都。由該國公使照會云云也。踰年總理衙門照抄法國照會。咨行江省。見中間所敘。皆江楚兩省之案。又竝索楚中賠款三萬兩。其湘潭等縣革職勒緝。亦同載照會中。蓋同一公文。而分咨江楚者。其後楚中如何議結。未見明文。若江省查辦此案。中丞不激不隨。方伯亦以楚事之嫌。陽謝之而陰持之。庶幾持平辦理者也。

按教法之害人。具見于魏默深海國圖志所載。及黃岡吳德芝所記。具詳第二卷中。予閱楚南公檄。謂其收養嬰兒。爲采生折割之用。室女自幼入堂。必過天癸之期。

始行遣嫁。而紅丸被其攝取。鍊入丹中。可以恣淫慾。資  
長生。又言黑夜傳教。所投婦女丸。率皆春方。能令女  
反求男。故其術久而不洩。間有泄其術者。令婦人帶歸。  
試之立驗。然皆無左證。若江西紳士送到之銅管血膏。  
尤涉曖昧。而其揭帖中言。毀堂之後。放出女嬰。皆目瞪  
口呆。不省人事。皆欲加之罪。而文致之。實無稽之妄語  
耳。吾友孫雪筠。截回會中二十七人。逐名點驗。其十歲  
內外者。尙能述其里居姓氏。且亦無一人訴稱教民害  
已。不願入會者。此可見矣。惟予初在快子巷。查得女嬰  
十三人。皆自五六歲至十歲上下者。詢以所養小兒及

女嬰之在孩抱者。則稱悉付乳婆帶回家中。又詢此等女嬰從何而來。則稱斷乳之後。始送入堂。又詢以男嬰豈無斷乳而稍長者。何以堂中不見一人。該教士詞窮。捏稱贖回。或稱送入村塾中讀書。皆支吾語也。城外之舊天主堂。予始查竝無收養之嬰孩。後聞自饒州帶來女嬰十餘人。查驗與城內所收年紀大畧相等。則該教士所云斷乳之後。送入堂中者。語亦近似。惟會中不收男嬰而收女嬰。又男嬰之長成者。不聞置有義學。而女嬰之長成者。必欲收入會中。且快子巷收養女嬰僅十三人。而查其照管之婦人。已有四名。且老少各半。此中

形跡種種可疑。時該教士又向予稱瑞州高安有女嬰業已贖回。後因擇配不遵教條。遂致兩姓涉訟。請代求大府。迅飭瑞州府審結。予不解其何意。令其具呈代達。內稱高安有育嬰會。係交本地從教之胡姓掌管。已歷多年。十年前有高安吳姓茂才。將女送入會中。迨其長成。前來取贖。當議付會中乳哺資二十千文。付過一半。便將此女領回。惟該會規矩。凡女嬰被人贖回。須在會立約載明。此女長大。仍憑教士作主指配。從教之家。不得於教外自行擇配。今吳姓領回之女。胡姓係會中首事。欲爲指配該族教內之人。而吳姓堅執女已贖回。應

聽自行擇配。兩姓口角。遂互控入縣。由縣入府。現尙未結等語。予固知此中曲直。不辨自明。請轉飭瑞州府持平斷結。旋據府中傳集兩造供詞。與該教士所呈畧同。惟吳姓堅執女已贖回。應聽自行擇配。且素不崇信天主教。不願與教內人爲婚。胡姓不能難。遂由府中斷結。飭令吳姓補出十千文。交胡姓收領。胡姓代擇之配。應毋庸議。取具兩造遵依。由該府詳請銷案。詎教堂獄起。方安之避入瑞州。復唆胡姓翻控。至今未結。當該教士呈請之時。予曾詰以收養之女。應指配教內人。則江省安得有從教相當之男女。又安能以從教之故。逼令遠

適異域。該教士笑曰。江省何縣何鄉無我國教中人。君固不知耶。旋據瑞郡函稱。胡姓呈送。逐年卷宗。該族皈依教法。實始于明季。然則該教之行。由來已久。一旦張膽明目。恃有奧援。宜其禍之相尋而無已也。

中西紀事卷之二十二

江上寒交

勦撫異同

成庸暮年。深見承平日久。文弛武玩。禁烟之令。稍以操切治之。輒啟邊衅。東南奸民。轉相煽誘。未易旦夕平也。天津乞撫琦相中。以先人之言。

上不忍生民塗炭。始允其請。迨舉事一不效。輒

簡授親臣宿將。授鉞誓師。惜將軍參贊意在羈縻。以致齎糧得志。鼓棹長駢。江浙之間。沿海騷動。然其怯者。漏刃破膽。忠者免胄歸元。而于國事終无濟也。

上輟飯拊髀。未嘗不意在良將。而閫臣輩更未聞有協心規畫以仰稱

聖意者。乃憤懣而乞撫事之請。論者徒見耆伊兩相自稱受

先帝密旨。便宜行事。不知

上見時事日艱。于守土之官。債軍之將。靡不寬其銜轡。示以優容。卽

大行遺詔中。亦引咎自責。不欲諉過于臣下。迨

今上登極。始明正其罪。告諭中外。是則撫事之請。乃

成庸不得已之苦衷。而非其本意也。琦相到粵在二十年



冬大角沙角之役。卽在十二月中旬。

上赫然震怒。特授奕山爲靖逆將軍。隆文楊芳爲參贊大臣。計其時不但在虎門未失之先。並琦相奏給香港之議亦未之見。轉圜不爲不速。至靖逆在安徽途次。連奉六百里廷寄。飭其一意進剿。不可存一通商之見。稍涉游移。更不可因有繳還定海之事。少加寬縱。蓋是時琦相方與義律說明。以香港馬頭易回定海。奏至之日。

上恐其仍蹈撫事之故轍。故復申以

訓諭。然將琦相奏給香港一摺。發交閱看。飭令崔切查明。卽使香港並非險要。亦必設法趕緊收回。斷不准給予該

夷貿易。致滋後患。等因。此二十一年二月十四日

上諭也。迨琦相奏逆夷聞大兵將集。意圖先事滋擾。十七日又奉

上諭。該逆妄肆鴟張。現聞內地調兵四出。窺伺朕早料其必有滋擾之事。惟香港距內地尙有四百餘里。倘能嚴密防堵。該夷亦只洋面游奕。虛張聲勢。他何能爲。定海退去兵船。諒必歸并香港。恃衆負隅。儘力抗拒。若兵力單弱。遠行進剿。恐有疎失。本日已降旨。飭令阿精阿。怡良等暫時協力防守。俟大兵雲集。再行攻剿。著奕山等兼程前進。抵粵後。與楊芳會合。統領各省調到兵丁。奮勇直前。殲茲醜

類母稍觀望。琦善摺著抄給閱看。欽此。据此則是時成。唐主勦之見。獨操乾斷。萬无轉移。靖逆過江西。卽聞虎門失事。果勇到粵。去虎門之役。僅六日耳。其時所調各省到粵之兵三千餘名。是以

上飭令將軍巡撫先事防守。所可異者。果勇到粵。未嘗交兵。與英夷一決勝負。輒聽彌利堅呈請通商。代爲具奏。其時何不與各夷人說明。令先將烏涌兵船退出。以試義律乞撫之誠否。若彌利堅但以此爲義律緩兵之計。是伐謀也。若果肯帶兵船與義律講論。是伐交也。伐謀則攻其心。伐交則斷其右臂。不務爲此。而樹援增敵之是慮。是病在

勝理而爲禁方者。欲以消散治之。不已偵乎。靖逆到粵。震于果勇先入之言。固已不能無怯矣。一旦兵臨城下。余葆純持其柄而搖之。彌利堅因其勢而利導之。六百萬之形。成矣。

上亦知痛勦之餘。必无納賂之理。惟念衅自燒烟起。償其價值。足以蠲息兵端。不謂將軍等贏糧而資之以入浙也。自此絕口不言撫事。浙東連陷三城。更

簡任親臣。益以西北勁旅。思所以前雪之。浙撫劉韻珂者。多機警。善與時俯仰。其自處也。欲身與名之兩全。見疆事日蹙。且將實逼省會。亟規以自脫。乃保奏伊相。請遣赴浙。

管効力。

上不許。迨大兵敗績于慈谿。更陳十可慮以嘗。

上熹復埒片力薦之。伊相者。昔年以附和琦相和議被。

嚴譴者也。當其奉。

欽差大臣之命。前赴鎮海。適琦相入粵。議撫咨會到浙。遂。

逗留不敢進兵。又遣家人張喜來往夷船上。牛酒餽問相。

望于道。洎接得粵東繳還定海之札。遂以收復奏聞。

上以其不遵諭旨。惟知順從琦善。嚴旨切責。卒與琦相先。

後被逮入都。

上以其家人張喜事涉通夷。奉。

諭自天津解交刑部毋令中途與伊里布見面核其前後  
上已洞悉其居心行事與琦善如出一轍業經奉

旨遣戍卽不令其終身廢棄亦斷不使之重赴海疆仍蹈  
前轍直待浙撫兩次瀆請始付杭州將軍耆英帶同往浙  
遂爲白門請撫之張本是則鑒前車而收桑榆

上之於勦固已至再至三沈審決策而出師無功討賊不  
效負乘致寇諸臣能無怍焉至于不得已而權其策之下  
者固始願不及此卽其再起伊相亦因疆臣之固請不得  
已而許之非

上之中悔而冀其收功于晚蓋也

浙撫劉韻珂受烏中丞之代。初到浙省。卽奏稱定海不可通商。臚陳八弊。持論甚正。迨洋氛入浙東。路告急。大兵又敗于慈谿。懼其實逼省會。乃陳十可慮之說于前。而埒片薦伊相于後。伊相到浙。首退乍浦之兵。亦中丞使之也。時將軍等已奉

密旨相機籌辦。而耆相蒞任杭州將軍。何以不在浙省了此一局。必待吳淞犯蘇。圖山入江。始踐前約。甚矣中丞之居心巧。而用計謫也。按十可慮疏中。却不及一撫字。然其末曰。凡此十者。皆屬必然之患。亦皆屬無解之憂。若不早爲籌畫。則國家大事。豈容屢誤。現在將軍赴海甯州查看。

海口情形。參贊大臣文蔚。留住紹城。調置前路防守事宜。究竟此後應作何籌辦。將軍等似亦尙无定見。臣渥被生成。若不將實在情形。直陳于

聖主之前。後日倘省垣不守。臣粉身碎骨。難蓋前愆。伏乞皇上俯念浙省事宜。實在危急。獨操

乾斷。飭令將軍等。隨機應變。妥協辦理。俾浙省危而復安。卽天下亦胥受其福。臣不勝迫切待命之至。夫曰獨操乾斷。非欲

皇上之速定撫議乎。曰隨機應變。非欲將軍等之暫事羈縻乎。蓋恐省城一旦不保。而厠身之無地也。旣倉皇而乏



徙薪之策。乃委曲以求代桃之人。其畧曰。臣前請將已革兩江總督伊里布。改發浙江軍營効力贖罪。未蒙允准。恩出自

上。臣何敢復行瀆請。惟念該革員之獲罪。究屬因公。且其按兵不戰。究與債事誤國者有別。我

皇上愛惜人才。凡中外獲咎。臣工苟心迹可原。咸荷棄瑕錄用。或令戴罪立功。不知凡幾。如周天爵。林則徐等。亦皆令其及時自効。仰見

聖德如天。不使諸臣終身廢棄之至意。伊里布與周天爵等同係譴戍之人。情罪似无二致。且公忠體國。並無邀功

近名之心。臣平生所見止此一人。現在將軍等差委需員。除隨帶司員之外。又調取各省丞倅牧令來浙委用。並令本省之貢舉生監查辦事件。若老成謹慎。不貪功。不圖利。如伊里布者。正可以備器使。況該革員爲逆夷所感戴。卽其家人張喜亦爲逆夷所傾服。若令其來浙。或該逆聞之不復內犯。亦未可定。可否仰懇

天恩。將伊里布發至浙江軍營。効力贖罪之處。出自

聖裁。臣冒犯

宸嚴。不勝戰栗如蒙

皇上鑒其無他。伏望俯賜采納。浙省幸甚。海疆幸甚。謹附

片陳明奉

硃批所奏不爲無見。另有旨。欽此。時

上已授耆英爲杭州將軍。遂

賞給伊里布七品銜。隨同赴浙。旋奉

密諭。本日據劉韻珂奏請。將伊里布發至浙江軍營効力贖罪。已有旨令隨耆英前往矣。現在浙省勦辦。旣難得手。則防堵是第一要務。萬不可再有疎失。該將軍等惟當激厲衆心。協力守禦。不可因前此失利。稍存畏葸。致該逆乘機更肆猖獗。耆英此來。已諭令與該將軍等相度機宜。通籌大局。臨時自必密商。至防堵保衛。是將軍參贊等專職。

倘有疎虞。獲咎孟浪。朕惟將軍等是問。該將軍等接奉此  
次密諭。惟有默識于心。斷不可稍露風聲。致令在事員弁  
兵丁。羣相觀望。貽誤事幾也。將此密諭令知之。欽此。据此  
則

成庸不得已而主撫。至此始露其端倪。而伊相至浙。適乍  
浦告陷之疾。置聞。中丞趣之至乍。以解眉睫之禍。伊相麤  
疎。曾无遠慮。而中丞用意深巧。既幸紓其目前之難。又自  
惜其身後之名。故不欲其成之于浙。以貽天下後世口實。  
遂嫁禍于伊相。以始終之。白門城下之盟。中丞實身局外。  
更貽三帥書。極陳後患。反覆千言。至于萬全无良策。則曰

當今之勢。戰亦敗。和亦敗。又曰大局既壞。攻補兩難。嗚呼。此以置事爲首鼠也。其謂逆夷感戴傾服者。不過修好于義律。及遣員護送餘姚被擒之夷婦。並張喜在鎮海定海間。數來往夷船犒問。此皆江浙士民傳之新聞紙中。以相訕笑者。而以之汙鱗刻章。欺朦

天聽。其咎豈但失言而已哉。至鹿澤長舒恭受等來往夷船。預通撫事消息。乃迭次保奏。謂其能折衝于口舌。是則中丞之力持撫議。雖百口不能辯。予故摘錄其前後奏詞。以見非備人鍛鍊之深文。且以明非

庸算中樞之本指。欺

君昧良。未可盡咎之者。伊二相也。

壬寅之冬。洋艘既退。一時在廷諸臣。封章連上。有謂竭千萬氓庶之脂膏。保一二庸臣之軀命者。

上念誓師命將。屢出無功。戰既無人。和乃失策。始追論前事。降。

旨令沿海督撫。將一切敗將逃官。詳查崔核。交部治罪。于是先取辱國之靖逆將軍奕山。揚威將軍奕經。參贊大臣文蔚。兩江總督牛鑑。松江提督余步雲。先後就逮入都。交部臣按律問擬。斬監候。秋後處決。余步雲先經裕帥家人控于都察院。奏聞。

上以其情節最重。于是年十二月二十四日奉

旨正法。奕經圈禁未久。旋

援葉爾羌幫辦大臣。又用文蔚爲古城領隊大臣。而琦相  
方自葉爾羌大臣升授熱河都統。于是江南道監察御史  
陳慶鏞奏。調逆人之敢于猖獗沿海。兵丁之敢于逃竄。  
馴至今日海島羣飛。鯨醜跋浪。爲所欲爲。莫敢誰何者。實  
由琦善于外夷入寇之始。首先示弱。以情我軍心。助彼毒  
焰。今海內糜爛。至于此極。卽罷斥琦善。終身不齒。猶恐不  
足馱民心。而作士氣。何況繫帶再加。脫俘囚而薰沐之乎。  
奕經夜卽自大深居閫中。頓兵半載。曾未身列行間。一朝

逞其虛憍之氣。志盈意滿。期于一鼓而復三城。卒之幾又不密。貽笑敵人。覆軍折將。一敗不支。此不復別科其騷擾供億招搖納賄之罪。罪已不勝誅矣。臣亦知奕經爲高宗純皇帝之後裔。

皇上親服。推念同氣。不忍遽加顯戮。竊意卽倖邀國典。亦宜圈禁終身。消除冊檔。無以貽

天潢宗室之羞。豈料圈禁未及三日。輒復棄瑕錄用。且此數人者。

皇上特未知其見惡于民之深耳。倘其俯采輿論。誰不切齒于琦善。而以爲罪魁。誰不疾首于奕經。奕山牛鑑文蔚。



而以爲投畀之不宥。維直道未泯。公論可畏。非臣一人之私言也。按該御史奏中所抉摘。皆親臣貴臣能言。人所不敢言者。然亦以此爲妨臣所忌。不得久居其職云。

方琦相之入粵。議撫也。穆相有力焉。是時穆相主滿首揆之席。東吳潘相國爲漢首揆。皆直機務。東吳資望素重。而枚卜已在垂暮之年。凡軍國大事。皆穆相主之。軍機入直內廷。其在。

上前多造膝語。故穆相之主持撫事。中外莫得其詳。靖逆粵中奏至。時王定九相國鼎方自東河查勘回。聞撫議伏青蒲痛哭。爭之不能得。相國以憂死。聞其病劇。召門下至。

卧榻前。伏枕流涕。授遺摺數千言。力排和議。卒爲枋臣所  
尼。不得上。白門之請撫也。祁尙書竊藻方奉

命入直機務。尙書于軍機爲後進。不敢自樹異同。迨見撫  
事之亟。穆相力贊其成。東吳緘默無一語。乃持正力爭之。  
成。庶心知其忠不能用。蓋度三帥之不能戰也。時事日艱。  
上雅不欲持可否。迨三十年

龍馭上賓。

今上嗣位。其年夏六月。英夷以火輪船由海道駛赴天津。  
直隸總督遣人詢其所自來。則以弔  
喪對奏聞。

上連召穆耆二相入見。二相以請助執紼。出自外洋修好之忱。意在許之。而未敢訟言。

上知夷情叵測。一旦假以詞色。必有覬覦非望之求。與其却之于後。不如拒之于前。爰

命直隸總督遣放回洋。而夷人亦唯唯如命。遂自天津起旋去。

上見夷情恭順。始悟昔年之逞志邊疆。實自內外臣工。未戰而先示之以怯。若今日呈請弔喪。因其名正而許之。豈有

龍輻鼓塗于大禁。而令異言異服之人。莛茅獻酎于其下。

卽肉袒勢面。

在天之靈其恫之矣。洋艘旣退。

上乃頒示膳黃。爲侯官雪冤。而首罪穆相。謂其傾排異己。深堪痛恨。遂並耆相罷之。于是勦撫之功罪是非。千秋論定。而枋政之臣。欲以掩天下後世之耳目。不可得矣。

附錄殷兆鏞請罷天津撫議原奏

咸豐八年

爲和議貽禍至烈。伏求

博采讜論。力黜邪謀。早決大計。轉危爲安事。竊自夷匪犯順。無識庸臣。但求速和了事。國家苟安一日。彼卽爲一日之親王宰相。而社稷隱憂。不遑復顧。琦善耆英伊

里布等既誤之于前。致貽今日天津之患。今之執政者。復誤之于後。其貽禍更有甚焉者矣。近聞和議垂成。爲賠償兵資等款。以堂堂大一統之中國。爲數千夷人所制。輸地輸銀。惟命是聽。而禍之尤烈者。莫若京城設館。內江通商各省傳教三條。聞者椎心。雖婦孺咸知不可。臣意桂良花沙納身爲

大清臣子。稍有天良。必不忍嘗試入奏。

聖上燭照如神。即使嘗試入奏。必不至墮其奸計也。古語云。毋滋他族。實偏處此。宋太祖云。卧榻之旁。豈容他人鼾睡。京師重地。外夷朝貢。猶且禁其出入。防其交接。禮

畢端返。毋許逗留。安有強敵世仇。而聽該酋置館禱居。齊齒胡越。橫行輦轂。羌夷布滿街衢。自古及今。實所未聞。近惟琉球國都英夷盤踞滋擾。甚至闖入王宮。莫敢攔阻。此其患無俟臣縷述也。長江自吳淞蜀中。貫天下之半。與海口情形不同。海口通商。已爲失計。然辟之于人身。猶四肢癱瘓之疾也。內江華夷襍處。則疾中心腹矣。東南漕運。非海卽河。大江爲出入所必經。設一旦江海並梗。何由而達。仕宦商賈之往來。章疏文報之馳遞。海非要道。江實通衢。夷人但以數船橫截江路。則南北將成兩界。維揚漢口。鱗網疲敝。梟販競作。再得逆夷爲

遁逃主。鹽利必盡歸夷有。而官鹽將廢。不但此也。所佔  
口岸愈多。聲勢愈大。與漢民交接事件愈煩。衅端亦易  
于起。地方官祖夷則民拂。祖民則夷拂。彼視虜一總督  
宰相如縛犬豕。其包藏禍心。无所不至。辟猶養虎在廂。  
養盜在家。隨時可以猝發。此議若成。大事便去。欲求爲  
東晉南宋之偏安。豈可得哉。至于傳教一節。臣不知其  
所謂天主者何人。大率惑世誣民。隱蓄異志。不然彼國  
尊天主。自行其教可耳。何必游歷各省。僕僕不憚煩苦。  
若是。近日之長髮賊。亦奉天主教者也。其煽惑勾結。已  
可概見矣。彼知輿地廣輪之數。山川阨塞之形。兵衛之

強弱壤土之肥瘠。到處交結豪俠。賤恤貧窮。爲收拾人心計。該夷蠶食海外小國。皆用此法。有明徵也。謀國者曰。通商傳教。此時姑先許之。候各省軍務完竣。然後舉行。夫民困于鋒鏑久矣。賊燄雖熾。人心未渙。猶冀重享昇平。若去一寇復招一寇。天下何望。將士民孰不解體。或曰。屆時徐議。所以拒之。臣恐積弱之餘。萬難發憤。現值兵臨城下。大臣猶曰。曩不可自我開。相率覲顏。忍恥。況許于前而拒于後。則直在彼而曲在我。誰肯爲國家出力耶。或逆有要約。不待賊平。遽入內地。布置周密。與長髮賊隱爲犄角。否則擊賊自効。別有要求。否則奪。



賊之城邑而有之。以爲非取諸我也。種種棘手。謀國者曰。不和則戰。戰果有把握耶。臣請詰之曰。然則和果有把握耶。夫和果有把握。從前反覆姑勿追論。第自今歲北竄以來。我之委曲順從。不爲不至。何以猖獗日甚。可見諱戰求和。和愈難成。成則禍且不測。謂戰必无把握。何以前年李開芳。林鳳翔等北犯。凶餒數倍于夷卒。至片甲不返。此無他。當時一意於戰。故有進無退。今則一意于和。故反勇爲怯也。現在僧格林沁兵威已壯。講求戰守。振刷精神。逆夷頗知畏愬。近日天津人民爭鬥之事。該夷亦避其鋒。鹽梟海盜。有欲焚搶夷船者。有跪

求欽差總督願糾衆打仗者。欽差總督不許。故未敢擅動耳。不得以偶經小挫。遂謂津民不足用也。試

飭桂良花沙納等勿專議和。會同譚廷襄。鼓厲兵民于文武屬吏紳士之中。得如謝子澄其人者。統率之。懸購重賞。隨宜設施。並令附近州邑。廣募壯勇。聽候調遣。一面  
明降

諭旨。大張撻伐。順天直隸京官。有愿回籍團練者。命設法辦理。如此多方准備。一旦狡焉思逞。僧格林沁大兵扼之于前。各路鄉勇躡之于後。加以洩水塞土。諸法夷船欲進不能。欲退不得。而謂不足制其命者。臣不信也。聞

英夷謀主哩咽叭。係廣東嘉應州人。兇悍異常。每至桂  
良花沙納公館。凌辱咆哮。臣不識桂良花沙納坐擁兵  
衛。亦已不少。何至畏一哩咽叭而不敢動。曾被津民檢  
住。欽差總督反爲之解圍。擬請飭令設法捕獲。立即梟  
示。不必稽留訊解。以免疏虞。又聞廣東九十六鄉民風  
驍勇。前年平紅頭賊。皆賴其力。夷匪往搜軍器。受傷而  
回。又糾南海番禺兩縣。令鄉民聲言。夷人入我界者。不  
論何人。登時殺死。遂不敢入。三月羅情衍龍元僖蘇廷  
魁到彼。團練已有數萬人。至今會否打仗。无有捷報。意  
者。

朝廷未與主張耳。抑羅愔衍等恐如黃琮、寶琿之獲咎耶。  
擬請

優旨作其銳氣。尅日大舉。惟黃宗漢稟承執政主和之議。  
繞道遷延。請

飭速往會勦。勿再徘徊觀望。轉掣紳民之肘。務使同心協  
力。迅奏膚功。天津夷船聞之。必有折回自救者。而我截  
其海口歸路。雖未必聚而殲旃。要非孟浪以僥倖也。謀  
國者曰。一戰不勝。奈何。曰。請添兵再戰。戰有勝有敗。若和  
則有敗無勝矣。曰。勝之于此。報復于他處。奈何。勝之于  
今。而報復于後日。奈何。曰。始終不忘戰而已矣。犬羊之

性。但經懲創。徃徃不敢報復。觀于道光年間。台灣失利。惟有藉手耆英。以報達洪阿等。而至今不敢垂涎臺灣。其無能亦可見矣。自古兵凶戰危。原非得已。盡人事以待天。成敗利鈍。雖諸葛亮不能逆睹。謀國者動以事無把握。搖惑。

聖斷。間執人口。沮喪士氣。坐失事機。其意直以望風乞降爲快。抑又何也。比年各省用兵。勝負無常。得失互見。諸臣何不以事無把握爲慮。而亟欲橐弓戢矢耶。伏願皇上通籌大局。深顧後患。知夷欲之難期。饗足念事勢之尙可挽回。左右親貴之言。未必盡是。大小臣工之策。非

盡無稽。執政諸臣請放夷船內駛者何人。請允夷酋要  
者何人。清夜思維。或亦自知狂謬。祇緣畏罪。怙非。陽  
作執迷不悟。

皇上不忍遽誅。應請面加訓示。俾各改心易慮。收效桑榆。  
否則難逃常憲。

嚴諭。桂良。花沙。納譚。廷襄等。非分要求。不得妄奏。事至則  
戰。無所依違。他如奕山。之以黑龍江外五千餘里。藉稱  
閒曠。不候。

諭旨。拱手授人。此尤寸磔不容蔽辜。臣知  
皇上之必有以處之也。

計謀既定。

渙汗斯頒。薄海憬然。咸知

上意所在。庶臣民之志固。而蠻夷之風懾。

天討聿新。操縱在我。或遂戰之。或終撫之。再行臨機應變。臣非不知。今所言者。

皇上已猷聞之。特以勢屬憂危。情深迫切。濡淚瀆陳。伏乞聖明洞鑒。謹奏。

按八年大沽之役。桂相議撫。其時在廷諸臣。封章連上。率多留中不發。此摺抄傳在外。因備錄之。其論和戰之利害。可謂深切著明矣。和親之議。倡于漢之婁敬。其時

樊噲請得十萬人橫行匈奴。大臣以爲可斬。乃漢孝武卒用其計。選兵命將窮追單于數萬里外。深入其廷。雖勞民傷財。而邊患因之稍息矣。宋何去非之論漢武帝曰。兵有所不必用。固又有所必用。古之人君有忘戰而惡兵其敝也。天下皆得以陵之。故其勢蹙于弱而不能振。匈奴之患起于高帝之末。高后及惠文景因天下初定。與民休息。深持柔仁不拔之德。其于兵也。固憚言而厭用之也。然漢之于匈奴。非深懲而大治之。其爲患也可勝言哉。是以孝武抗其英特之氣。選徒習騎。擇將命師。先發而昌誅之。師行十年。斬刈殆盡。名王貴人俘獲。



數百。單于窮遁漠北。遂收兩河之地。而郡屬之制。四世之侵辱。遺後嗣之安強。至于宣元成哀之世。單于頓顙。臣順。謁期聽令。比于內諸侯。雖曰勞師。匱財。而功烈之被遠矣。使微孝武。則漢之所以世被邊患。其戍役轉餉。以憂累縣官者。可得而預計哉。乃昧者不知求夫天下之勢。強弱之任。而猥以其黷于兵。與秦皇同日而譏之。豈不痛哉。按

國初龍興。其時北部之尼堪外蘭及扈倫四部。方貳于明。世爲仇敵。

太祖

太宗次第征之至于

聖祖平定噶爾丹則自黑龍江以西盡喀爾喀四部之地  
東西五千里南北三千里凡蒙古游牧之區皆歸一統  
時與俄羅斯定邊界黑龍江之南岸盡屬中國乃歸我  
昔年侵地定市于喀爾喀東部之庫倫立石勒會議七  
條刑牲爲誓于是東北數千里化外不毛之地悉隸版  
圖迨乾隆間蕩平準部戡定回疆則西北窮塞之域極  
于天山葱嶺計前後大小用兵數百戰餉需萬萬拓地  
之廣超軼前代此殆所謂刷數世之侵辱遺後嗣之安  
強者歟今之議撫者不過曰以息兵以安民也漢高帝

白登一蹙。遽議和親。撫之不爲不速。而高后及惠文景  
四世。貽患。安見與民休息之終。收其效哉。今且以明事  
論之。明之倭患。始于奸商浸尋。及于豪貴朱執。下車首  
請。窮治奸黨。掃除內盜。此爲拔本塞源之治。若非諸貴  
家內結臺官。坐其啟衅。則倭寇可平。其後海禁漸弛。浙  
東再亂。王忬普陀山之捷。張經王江涇之捷。中樞蔽嫉。  
中以蜚議。論者惜之。胡宗憲牽制嚴趙。未嘗不有意于  
撫然。其賄斬徐海。誘擒汪直。是亦所謂千金用兵。百金  
求間。豈得以賞奸賄盜。深文而致之哉。其後俞大猷經  
營兩浙。戚繼光駐馳閩海。卒收其成。而東南之患以息。

此非勦之成效歟。萬厯間。倭侵朝鮮。朝廷發兵援之。李如松平壤一捷。生繫三倭。廓清之功。可旦夕俟。徒以碧蹄輕進。一簣功虧。于是沈惟敬之欺計復行。顧養謙之封貢續請。乃倭人朝受冊書。夕羈鄰使。澄山不退。鵬綠潛窺。而邢玠等奉政府處分。猶以陽戰陰和。陽勦陰撫。密爲指授。于是捷章連上。虛級冒功。直待關白貫亡。惟敬棄市。禍始稍息。然則撫之無益可覩矣。前之擾在南。而勦收其效者。將帥之得人也。後之擾在北。而撫卒無益者。筦樞之失策也。勦而後撫。其庶幾諸葛武侯之于孟獲。唐太宗之于頡利乎。撫而後勦。雖漢之文景。不能

得之于匈奴。何況其他。今之英吉利。未必大于明之日  
本也。其爲患于中國。不如日本之久也。然沙角之斃夷  
兵者數百。吳淞之斃夷兵者數百。定海之斃夷兵者千  
餘。是官兵之勦。未嘗無成效也。一創于粵東之三元里。  
再創于廈門之陳姓。三創于靖江之居民。是鄉勇之勦。  
未嘗无成效也。乃自粵東議款以來。在我則曰罷戰而  
議撫。在彼則曰先戰而後商。粵東就撫而擾于閩浙。乍  
浦就撫而擾于吳淞。撫之無益可觀也。今叅核前後比  
事屬詞而論之。林文忠之燒烟。其操切有似于朱統。然  
統之議海禁。先內而後外。當其初至。卽捕通倭者九十

餘人立斬之于演武場。予以此惜文忠之未能盡法以治洋商也。義律馬利遜者其明之徐海汪直乎。天津不誅失幾一也。粵東夷館不擒失幾二也。三元里解圍而出失幾三也。夫其罪十百于徐海汪直而其時擒之之易如釜中之魚。几上之肉。而交臂失之。然則當日之斷斷焉持撫議者有能如胡宗憲之不激夷禍。不損國威。深沈而速決者乎。其輕營之也。若夫粵東之撫靖逆奏稱四月初八日之捷。江浙之撫楊威奏稱鎮海定海之捷。又從而保舉在事之文武員弁。是又明之邢玠楊鎬輩虛級冒功。張濂所謂罰罪之典移而爲賞功之令者。

今昔情形異代同揆可勝慨哉